



HE 8.4.2013 7

PROGRAM MOTIVASI... Seramai 17 pelajar Tingkatan Lima SMK Mutiara menghadiri program motivasi di Universiti Malaysia Sabah, Kampus Antarabangsa Labuan (UMSKAL), baru-baru ini.

Program itu bertujuan bagi mendedahkan kepada pelajar suasana pembelajaran dan pengajaran di universiti sempena program Karnival Aku Mahasiswa Universiti (KAMU) 2013 peringkat UMSKAL.

Dekan Sekolah Sains Informatik Labuan (SSIL), Dr Ag Asri Ag Ibrahim yang mewakili Pengarah UMSKAL, Prof Madya Dr Ismail Ali merasmikan acara Unilife Expose sempena program KAMU 2013 di ruang legar Bangunan Menara UMSKAL.

Turut hadir Pegawai Kaunseling UMSKAL, Nur Iman Reedzal merangkap Penyelaras Program KAMU, Penolong Pendaftar Pusat Kokurikulum dan Pemajuan Pelajar, Md Fadzli Sarudi dan Pengarah Program, Azriah Ismail.

Ag Asri berkata program itu dilaksanakan sebagai simbolik kepada karnival tersebut yang bertemakan Mahasiswa Berketerampilan Harapan Negara. Katanya, ia juga diadakan untuk memberi motivasi kepada pelajar-pelajar yang bakal menduduki SPM dan STPM pada tahun ini.

Program Unilife Expose memberikan gambaran sebenar mengenai pembelajaran di bilik kuliah, pendedahan mengenai kepentingan kemahiran pembentangan, bertutur dalam Bahasa Inggeris, pengurusan masa dan tugas berkumpulan.

Kelihatan dalam gambar, Dr Ag Asri (enam kanan) dan Nur Iman (lima kanan) bersama pelajar SMK Mutiara.